

MONITION

Na Nzambi na beto lukumu,
 Na Nzambi na beto ntonda,
 Na bana Nzambi ngemba,
 Na bana Nzambi kieeeeese,
 Na lubutuku ya Yezu Ayayééééé !

Bampangi batondama,
 Kilumbu ya Nzambi silaka beto yo yayi imene kulunga. Yai mpimpa ya lugulusu na beto bantu. Un Sauveur nous est né, un Fils nous est donné !
 Mfumu Nzambi, na lutondo na Yandi ya kukonda ndilu, imene kupesa na beto Mwana na Yandi Umosi ya imene kukituka muntu, bonso beto, sambu nde beto bantu kubaka bunzambi na Yandi. Kiese go kiese ve !

Bubu Dibundu ya mvimba ikele kusungimina lubutuku ya Mwana Nzambi, Ngulusi na beto ye Nzambi na beto. Yandi ke kwisa kukatula beto na kimpika ya masumu, ye na mpimpa ya mpila na mpila.

Noel ikele nkinsi ya Nkenda : Nkenda ya Nzambi sambu na beto bantu, nkinsi ya **kiese**, ya **ngemba**- telle est la tendresse de notre Dieu-, nkinsi ya **lutondo**, **nsemo** -le peuple qui marchait dans les ténèbres a vu se lever une grande lumière ; Jésus vient nous délier de la corde de misère qui nous gardait captifs- mpamba ve lugulusu ya Nzambi silaka beto tuka ntama bubu lusilu yina imene kulunga.

Na Yandi Yezu, Nzambi kibeni imene kukwisa na kusonga na beto bantu lutondo na Yandi. Noel ikele dikabu ya kieleka ya Nzambi ke pesa na beto. Kabu ya lutondo : “ Nzambi me tonda beto na kiteso ya kuluta nene, Yandi me tindila beto Mwana na Yandi Umosi kibeni”. Na yo, beto lenda kutita diaka ve, sambu ngemba na beto imene kulunga.

Beto yilama na kutambula makabu yai yonso ya beto ke lomba na Mfumu Nzambi.

Kansi beto kulomba ntete ndolula ya masumu na beto na ntwala beto kutambika kimenga yai ya santu-santu ya misa.

HOMELIE DE SON Exc. Mgr l'EVEQUE POUR NOEL 2015
*(Cette homélie est à lire pendant la messe de minuit et du matin
 intégralement sans un autre commentaire)*

**« NDINGA ME KITUKA MUNTU, YANDI ME ZINGA NA KATI NA
 BETO », “YANDI IKELE NTOTILA YA NGEMBA”!**

Bampangi batondama, bana ya Nzambi,

Na luyantiku ya malongi yai ye na mpimpa yai ya santu-santu, mono ke zodila beno nkinsi ya noel ya mbote ye ngemba ya Mwana Yezu imene kunatila beto.

Noel disongindila nde Nzambi imene kukota na ntoto ye na luzingu na beto bantu: “Ngogo ya Nzambi me kituka muntu, ye yandi me zinga na kati na beto”. Yandi Emmanuel, mpila mosi nde “Nzambi ikele na beto”. Yandi imene kuzinga na ntoto na beto ye imene kukituka nduku ye mpangi ya nkonso muntu. Kiese go kiese ve !

Na yandi, beto imene kuzwa yonso ya mfunu ye ya mbalu sambu na luzingu na beto !(Jn 1, 16-17). Noel ikele mpi sambu na beto mpila ya kusengumuna konso mvu diswekamu yai ya lukituku muntu ya Nzambi na kati na beto, mvukana na beto ti Yandi ya « Mwana Umosi kaka me kwisa kumonisa na beto ».

Bampangi batondama,

Yezu ya imene kubutuka, imene kukwisa sambu na ntoto mvimba, sambu na makanda yonso ye bandinga yonso. Yandi imene kwisa kugulusa konso muntu, konso dikanda ye konso ndinga. Yo yina, konso muntu, konso ndinga, konso dikanda ikele ya mfunu ye ya mbalu na ntwala na yandi. Yezu imene kubutuka sambu na nge ye sambu na mono, sambu na konso muntu, mbuta go leke.

Yo yina, beto zitisa konso muntu; kuvweza mpangi ve; kumenga mpangi ve; ata yandi ikele mwana ya fioti go mununu. Pesa na konso muntu Lukumu yina ya Nzambi me kwisa kunatila beto na Mwana Yezu. Zodila ngemba ya Yezu imene kunatila beto na konso muntu.

Na yo, beto ikele ti mfunu ya dienga ya Emmanuel, sambu na kumona na konso muntu kifwanisu ya Nzambi ya beto ata yantika na kutunga, tuka bubu yai, luzingu ya mpa ye kinduku ya mpa !

Bampangi bana ya Nzambi,

Nkinsi yai ya Noel, ke natila beto na kiteso ya kuluta Nsangu ya Ngemba, ata baluswaswanu ikele na kati na beto : luswaswanu ya ndinga, ya bwala, ya nsi. Nkinsi yai ya Nzambi imene kukituka muntu ke bambula beto mbundu nde konso muntu ikele kigangwa ya Nzambi. Na ngindu yina, beto kusamba ye kulomba dienga na Mfumu Nzambi na mpila nde menga ya bantu ya imene kunoka mingi na ntoto mvimba ye na nsi na beto kufula diaka ve na kunoka; nde Nzambi kusadisa beto na kuzitisa luzingu ya Yandi imene kupesa na konso muntu; mpamba ve Yandi kugangaka beto yonso na kifwanisu na Yandi. Yandi imene kutonda beto na Lutondo ya nene; yo yina Yandi imene kutindila beto Mwana na Yandi Umosi kaka. Yandi imene kutula ndilu ve sambu na kuzola beto bantu. Kansi beto, beto imene kutula bandilu na lutondo na beto sambu na baluswaswanu na beto; yo yina beto ke fwana ve na kuzola ya kieleka bampangi na beto.

Beto lombamba nde: Yandi Mosi Emmanuel, kutula ngemba na ntoto, na Mafamilia ya ke konda yo ye na ntima ya konso muntu, mutindu ya beto imene kuyimbila : “Nkembo na Nzambi na kati ya zulu ye ngemba na ntoto na bantu ya yandi ikele kutonda”. Beto kukuna ye kusosa ngemba na bifulu yonso ya beto ke zinga.

Propheta Sophonie na munkanda na yandi ke zabisa beto nde: “Kutita ve Yeruzalem, Mfumu Nzambi ikele na nge” (Soph 3, 17). Bampangi, beto kusosa nde, na Cité na beto, na mabwala na beto, na Nsi ye na Ntoto na beto ata muntu mosi ve kuzinga na boma! Boma sambu bo ke sosa na kufwa go kukota yandi nsoki; boma sambu na kuyindula kana mbasi yandi ata vanda diaka na luzingu; boma sambu ba keti-keti imene kulutula mingi. Beto zaba nde: noel ikele luyalu ya masonga, ya ngemba ye ya kiese sambu na ntoto mvimba.

Konso mukristu kusosa masonga na mpila nde na nsi na beto ngemba ye kiese kuyala.

Bampangi bana ya Nzambi,

Noel ikele ntete-ntete nkinsi ya Nzambi ikele kusonga na beto Nkenda na Yandi, ya Yandi me monikisa na lubutuku ya Yezu Kristu. Yai Nkenda ya kieleka ya Yandi imene monisa na beto ye na ntoto mvimba: “Lugulusu me kuma awa na ntoto; ngemba na beto imene kulunga”.

Kwa beto imene kuyantika mvula yai ya Tat’eto François me kangula na le 8 Décembre nde mvula ya **“NKENDA”** (Miséricorde) na Dibundu na beto ya mvimba, beto kuzingila Nkenda yina sambu nde ntoto na beto kusoba ye kubaka luse ya mpa. Kana beto ikele kuzingila nkenda ye ndolula, beto ata vanda bantu ya ikele sadisa ye sadila bankaka na nzila ya lutondo. Ntu dibansa ya mvula yai ya bisambu na Diocèse na beto ikele kukwendila kumosi ti ntu dilongi ya Dibundu na beto ya mvimba: **“KUKANGAMA NA KIMPANGI YA LUTONDO YE YONSO KAKA NA LUTONDO”** (Etre solidaires dans l’amour et tout par amour). Beto yonso kuvanda muntu mosi sambu na kutunga ye kiese diocese na beto na bisalu ya nkenda : ntima ya mawa, lutondo, kukaba, ndolula, bumosi, kimpangi (fraternité), mbatalala-mbundu, kusosa ngemba ye masonga, makieleka... Kana beto zingila mabundu yai ya nkenda, nkenda ya ikele Nzambi Yandi mosi kibeni, Mafamilia, Nsi ye ntoto na beto ata bonga ye konso muntu ata zinga luzingu ya kieleka.

Bampangi batondama, beno yonso ya imene vukana awa na mpimpa yai ya santu-santu, kumosi ti Dibundu na beto ya mvimba, kumosi ti bana fioti yonso ya ke zinga na bala-bala nkatu kiese ya familia, kumosi ti bantu yonso ya ikele kutina bitumba ye ke tambula ndambu na ndambu na kusosa kifulu ya ngemba (migrants, refugiés, exilés), kumosi ti bantu ya boloko ntete-ntete bayina ke na boloko nkatu kikuma, kumosi ti bambefo ye na bantu yonso ya ikele na mpasi ya moyo ti ya nitu, na bantu yonso ya ikele kusamba kumosi ti beto na ntoto ya mvimba: beto kulomba na Mfumu Nzambi dienga ya ngemba.

Mono ke yambula beno na Nkenda ya Mfumu Nzambi, na nsadisa ya bisambu ya Mama Maria Mwense kaka, ya imene kubutila beto, na mpimpa yai ya santu-santu, Ngulusi ye Nzambi na beto, Emmanuel!

Na beno yonso nkinsi ya mbote !

Donnée à Idiofa, le 24 Décembre 2015 en la Solennité de la Nativité du Seigneur.

+ José MOKO EKANGA

Evêque d'Idiofa